

Dithero tsa Tirelano mo Kutlwanong

11/2014 ka Sonttaga wa bobedi morago ga moletlo wa Epifania, e le ka 19. 01. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 164 - 146/149

2.Thapelo: Modimo wa boutlwelebotlhoko, Rara wa lorato, yo o re rometseng Morwao gore a re senolele lorato lwa gago, re a go kopa gore o fetole popego ya rona e e ngaparetsweng ke boleo, o re tlatse rona ba re neng re le batlhanka ba molao, o re tlatse ka Mowa wa bongwana ka Morwao Jesu Keresete, Morena, Morepholosi. Amen.

3. Epistolo ka fa thulaganyong ya 2 e kwadilwe mo go Baroma 12:4-16;

Efangele ka fa thulaganyong ya 1 e kwadilwe mo go Johane 2:1-11.

4. A go ipolelwe tumelo ya bokeresete!

5. Sefela sa 84 - 78/81

6. Thapelo ya mmadi wa thero.

7. Epistola ka fa thulaganyong ya 6 e kwadilwe mo go Bahebere 12:12-25, e re: "Ka ntlha ya moo tiisang diatla tse di repileng le mangole a a kgwetlhang. Lo direle dinao tsa lona ditsela tse di tlhamaletseng gore setlhotso se se ka sa relela, mme bogolo se alafege. Latelelang kagiso mo bathong bolhe le boitshepiso jo go seng ope yo o tla bonang Morena kwa ntle ga jona; lo ele tlhoko gore go se nna ope yo o diegelang bopelotlhomogi jwa Modimo, e se re gongwe modi o o galakang wa tlhoga, wa senya mme batho ba bantsi ba kgotlelega ka ona. A go se nne ope yo e leng seaka kampo yo o sa itshekang jaaka Esau yo o bapaditseng botsalwa-pele jwa gagwe ka sejo se le sengwe fela. Kana lo a itse, fa e rile morago ga moo a eletsa go rua boswa jwa tshegofatso, a latlhwa; gonne ga a ka a kgona go ka fetola pelo, le fa a go batlile ka dikeledi. Gonne ga lo a tla fa thabeng e e ka angwang le e seng fa molelong o o tukang le e seng fa bontshong, le e seng fa lefifing le e seng fa ledimong, le e seng fa go leleng ga lonaka le e seng fa tumong ya mafoko a bautlwi ba yona ba kopileng gore ba se ka ba tlhola ba okelediwa lefoko lepe. Gonne ba ne ba retelelwa ke go itshokela se se laotsweng se se reng: 'Tota le setshedi, fa se ka ama thaba eo, se be se na le go kgobotlediwa ka majwe gongwe go

hulwa ka metswi.' Mme ponalo e ne e boitshega mo go kalo, fa Moše a bileng a re: 'Ke tshogile, ke a roroma.' Mme lona lo tsile fa thabeng ya Sione, le mo motseng wa Modimo o o tshelang, e bong Jerusalema wa legodimo, le kwa masomosomong a baengele le kwa kgobokanong ya moletlo le mo phuthegong ya batsalwa-pele ba ba kwadilweng kwa magodimong, moatlhodi wa botlhe, le fa meweng ya basiami ba ba dirilweng botlalo, le fa go Jesu motsereganyi wa kgolagano e ntšhwa, le fa mading a kgatsho a a buang go gaisa a ga Abele. Itiseng gore lo se ka lwa gana yo o buang. " Amen.

8. Thero: Barategi mo Moreneng wa rona Jesu Keresete, go maswe, fa bakeresete ba lebala tse di diragetseng mo thabeng ya Sinai, mo Betleheme, le mo thabeng ya Sione. Go maswe go feta, fa bareri ba lebala ditiragalo tseo. Go maswe bogolo, fa bareri ba fetola tse Modimo o di ikaeletseng ka tse di diragetseng mo mafelong a le mararo ao. Fa ditiragalo tsa teng di lebetswe, ke fa go tlhokega gore bakeresete ba kaelwe ka dikaelo tse re di fitlhelang mo lefokong la thero ya kajeno. Fa ba gopola ditiragalo le maikaelelo a tsona, dikaelo tse di umakiwang mo lefokong la thero ya kajeno di tla latelwa fela ke ba ba di utlwang. Ka moo a re tlhokomeleng ditiragalo tse di diragetseng le maikaelelo a Modimo o a ikaeletseng ka tsona!

1. Mo thabeng ya Sinai;
2. Kwa Betleheme;
3. Mo thabeng ya Sione.

1. Ke a solofela gore botlhe ba ba tlhomamisitsweng mo Kerekeng ya Lutere ba tla araba ka pele, fa ba bodiwa gore ke eng tse di diragetseng mo thabeng ya Sinai. Go itsiwe, fa Modimo o senoletse molao wa ona, gongwe ditaolo tse some. Le tsona tse di umakiwang mo lefokong la thero ya kajeno di gopolwa, fa e ne e le ponatshego e e boifisitseng batho mo go maswe, jaaka re utlwa gore mo thabeng ele batho ba ne ba ilediwa gore ba se ka ba atamela, le e seng go e ama, fa e thukile ka molelo, go ne go na le bontsho le lefifi, ga bonala magadima, ga lela lonaka ka tumo e e boifisitseng batho. Bautlwi ba mafoko ba ne ba tshositswe, ba roroma mo go maswe." Ka letswalo la bone ba ne ba supa gore ba ne ba tlhaloganya maikaelo a Modimo o a ikaeletseng ka go ba senolela molao, gongwe ditaolo tsa ona, gore ba tshosiwe, ba ikwatlhaye, ba boife, fa ba itlhatlhoba ka fa ditaolong tsa Modimo. Gonne di filwe batho gore ba itse maleo a bone, ba lemoge, fa e le baleofi fa pele ga Modimo. Ke ona maikaelelo a magolo a Modimo ka go ba senolela ditaolo tsa ona. Ke re: Go maswe fa batho ba lebala maikaelelo ao, go maswe bogolo fa a fetola maikaelelo ao, ka go tsietsa batho ka diphetolo tsa bone, fa ba re:

Ditaolo tsa Modimo di botlhofo fela, motho o ka di dirafatsa ka pele, le go ipaakanyetsa manno a mantle mo legodimong, fa a di dirafatsa. Mme tota-tota molao o re: "Go hutsitswe mongwe le mongwe yo o sa direng tsotlhe tse di kwadilweng molokwalong lwa molao." Go gongwe go kwadilwe gore "mme jaanong ra itse gore dilo tsotlhe tse molao o di buang, o di bua le bone ba ba mo taolong ya molao gore molomo mongwe le mongwe o thijwe, mme lefatshe lotlhe le nne molato fa pele ga Modimo. Ke ka moo go se nang motho ope yo o tla siamisiwang fa pele ga ona ka ditiro tsa molao; gonne molao o re naya kitso ya boleo." Ke ka ntlha ya moo, fa mongwe a tla tshoga mo go maswe yo o tloganyang tse Modimo o di ikaeletseng ka go senoletse batho ditaolo tsa ona. O tla lemoga, fa e le moleofi, fa a sa kgone go ipaakanyetsa botshelo jo bo sa khutleng ka tse di diragetseng mo thabeng ya Sinai, fa a tla tlhoka go thusiwa ka tse di diragetseng kwa Betleheme le mo thabeng ya Sione, le ka tse Modimo o di ikaeletseng ka tse di diragetseng teng koo.

2. Le malebana le tse di diragetseng kwa Betleheme batho ba di itse. Ba a itse gore kwa Betleheme Jesu o tsetswe teng. Mme malebana le tse Modimo o di ikaelelang ka botsalo jwa gagwe, ga ke rate go tiisa mo go kalo, fa botlhe ba di itse, bogolo mo sebakeng sa kajeno, fa motho a bona ka fa boitumelo jwa botsalo jwa Morena Jesu Keresete bo fetolwang ka teng ke bontsi jwa batho. Mme a re se ka ra itshwenya ka bone jaanong, mme re nne re leboge Modimo ka ntlha ya tse di ipolelwang ke kereke ya bokeresete ka tiragalo e kgolo e ya botsalo jwa ga Morwa Modimo go nna motho ruri, jaaka re ipolela bogolo ka meletlo e megolo ka boipolelo jwa kwa Nitsea, re re: "O fologile kwa magodimong ka ntlha ya rona batho le ka ntlha ya pholoso ya rona, a tlhologa mmele ka Mowa o o Boitshepo mo go Maria wa lekgarebe, a nna motho." Gongwe ka mafoko a moengele yo o boleletseng badisa a re: "Se boifeng; gonne bonang, ke lo tsiseditse mafoko a a molemo a boitumelo jo bogolo jo e tla nnang jwa batho botlhe; ka gonne gompiano lo tsaletswe Mogolodi mo motseng wa ga Dafita, yo e leng Keresete Morena." Ke gore a re se ka ra lebala tse Modimo o di ikaeletseng ka go roma Morwaaona go tsalwa go nna motho ruri. O ikaelela gore re dumele, fa o re rata mo go kalo ka go re neela Morwaaona gore mongwe le mongwe yo o dumelang mo go ene a se ka a latlhega, mme a nne le botshelo jo bo sa khutleng. Le ka tiragalo ele ya go tla ga batlhalefi ba ba neng ba tswa kwa botlhabatsatsi e Modimo o supileng maikaelelo a ona, fa a batla gore le batho ba baditšhaba ba tle go obamela mo ngwaneng yo ba mo tsaletsweng.

3. Go ntse fela jalo ka ditiragalo tse di diragetseng mo thabeng ya Sione, kwa Jerusalema. Teng koo Morwa Modimo o ne a boga, a bogela batho ba merafe yotlhe, a ba swela mo sefapaanong,

a fitlhwa, mme bogolo o ne a tsoga teng mo baswing go tiisa, fa Rraagwe a amogetse tse re di diretsweng ke Mopholosi wa rona gore kereke ya bokeresete e ipolele tse di diragetseng teng ka boipolelo jo bo reng: "A bapolelwa sefapaanong ka ntlha ya rona metlheng ya ga Pontio Pilato, a boga, a ba ba fitlhwa. Mme o tsogile ka letsatsi la boraro ka fa Dikwalong." Tseo di akarediwa ka mafoko a a reng: "Jesu Keresete ke yo o neng a neelwa losong ka ntlha ya ditlolo tsa rona, a ba a tsosediwa go siamisiwa ga rona."

Ke yo o gopolang tse di diragetseng mo thabeng ya Sinai, le kwa Betleheme, le mo thabeng ya Sione, le tse Modimo o di ikaeletseng ka ditiragalo tseo ga a nke a lapa mo tumelo, le e seng go nyatsa tshegofatso e a tshegofaditsweng ke Modimo ka yona jaaka Esau a ne a nyatsa tshegofatso e e neng e mo tshwanetse ka go nna lebutswa-pele ka go e latlha ka ntlha ya dijonyana fela, le e seng go hularela yo o re baakanyeditseng tse di molemo mo go kalo, mme o tla tlhomama mo tumelong, le go lebogela ditshegofatso, le go ngaparela mo go ene yo o re baakanyeditseng manno a mantle mo kgalalelong ya gagwe gore re itumelele go itshekisiwa ka boitshekiso jo bo tshwanetseng bana ba Modimo, le go nna mo motseng wa Modimo o o tshelang mmogo le baengele ba ba boitshepo mo phuthegong ya batsalwa-pele ba ba kwadilweng mo legodimong; le fa Modimong o o shelang, moatlhodi wa botlhe, le fa meweng ya basiami ba ba dirilweng botlalo, le fa go Jesu, motsereganyi wa kgolagano e ntšhwa, le fa mading a kgatsho a a buang go gaisa a ga Abele. Amen.

9. Thapelo: Modimo Rara yo o mo legodimong, re a leboga, ka o re gopoditse ka tsediragetseng mo thabeng ya Sinai, le kwa Betlheleme, le mo thabeng ya Sione gore re se lape mo tumelong, mme re nnele ruri mo go yona, re nne re itumelele tse re di baakanyeditsweng ka Morwao yo o rategang, Morena le Mopholosi wa rona Jesu Keresete. O re utlwe ka ntlha ya gagwe. Amen. Thapelo ya Morena: Rara wa rona yo o mo legodimong ...

10. Sefela sa 134 - 122/125

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.